

四庫全書

史部

欽定四庫全書

史部

張襄壯奏疏卷三

詳校官國子監司業_臣納麟寶

編修_臣裴謙覆勘

總校官編修_臣倉聖脉

校對官中書_臣李 紱

謄錄監生_臣陳元熙

欽定四庫全書

張襄壯奏疏卷三

甘肅提督靖逆侯張勇撰

靖逆將軍兼管甘肅提督事務臣張勇謹

題為征勦須用騎兵營員尤宜遴補籲請

俞旨以資戰守事竊臣奉

命專征職司軍旅所有行間一切應行事宜皆當預為
籌畫悉心佈置始不至臨事倉皇以蹈覆轍也目今賊

氛未滅命將出師恢復郡邑非用騎兵不足以壯聲援
查臣標五營原設馬兵三千名步戰兵二千名嗣因製
造盈甲裁去步戰兵一百名撥往洪水馬步兵各一百
名共裁撥馬步兵三百名今當進勦之際需兵孔亟臣
欲抽調各路之兵則在在留守城池難於離汎又查各
營官兵經去歲撥防興安陽平等處俱未回營見在招
募復難調撥似應將臣標裁撥過馬步戰兵數內聽臣
募補足額并於步戰兵二千名內俱改為馬兵如是則

臣標五千名數內俱為騎兵用以征勦庶軍聲大振矣
至於臣標五營併衝要各營等員缺尤須亟為推補因
材擬用方於守禦有賴也但臣蒙

皇上恩加將軍之職則臣標中軍一官有提綱挈領統
率五營之責必得副將職銜方可鈐束查臣標五營遊
擊內有投誠者有可擬陞用者其中營叅將黃鉉才能
出衆膂力超羣補用永固營副將以資彈壓庶衝營有
賴矣所遺中營今

題請副將員缺查安遠叅將劉選勝隨師攻勦果敢有
謀堪以補用也其左營遊擊張祚酌其才之所優擬另
調用所遺遊擊員缺以本營守備史孔筆補用至所遺
守備員缺查本營千總桂奇可以任用也其右營遊擊
呂成德年已七旬有餘又係通事業經題請休致所遺
遊擊員缺以本營守備張文星補用已經任事從征數
月矣其前營遊擊陳應啓亦係通事擬另陞用所遺遊
擊員缺查本營千總李弘鑒堪以推補也其後營遊擊

呂天玉亦才各有長擬另調補所遺遊擊員缺查馬營
墩守備劉虎堪以補用也更右營守備張進忠歷練營
政膽智無優用補洪水衝區實為允當所遺守備員缺
查本營千總田養心堪以補用也更前營守備邊永昌
擬陞山丹營遊擊所遺守備員缺查本營千總張士奇
堪以補用也更後營守備張銓擬陞蘆塘營遊擊所遺
守備員缺查右營千總孫應宰堪以補用也以上諸員
皆久歷行間兵機熟諳才優膽壯戰勝攻克用補前缺

各稱所長并擬步戰悉改馬兵皆係目今進征急務倘
邀

俞允則勦禦有資膚功可立奏矣至於中軍副將闕防
乃兵馬錢糧所係尤祈

勅部另行鑄給其所需戰馬二千匹業已移咨撫臣招
中茶馬牽領補額俟事平再為裁減可也臣謹會同甘
寧撫臣華善合詞具

題伏乞

皇上睿鑒勅部議覆施行康熙十四年四月二十一日
題奉

旨戶兵二部會同連議具奏欽此查得靖逆將軍侯張
勇見今統兵勦滅逆賊正需官兵該將軍所題均應准
從奉

旨依議

靖逆侯靖逆將軍兼管甘肅提督事務臣張勇謹

奏為恭謝

天恩事康熙十四年五月初一日准兵部咨為密首偽諭偽劄偽印式事內開奉

旨靖逆將軍張勇勲舊大臣忠貞素著近因王輔臣背恩反叛殫抒偉畧悉心籌畫又舉首吳逆偽劄益勵忠純克盡臣節深為可嘉著封為靖逆侯欽此欽遵移咨到臣准此臣即恭設香案望

闕叩頭謝

恩訖伏念頒爵之典

朝廷所以待有功者也臣以庸劣謬膺節鉞蒙

皇上不加擯斥俾得待罪巖疆冀效涓埃之報少補疎
曠之愆此臣之素願所可矢天日而質鬼神者耳至於
亂臣背叛誓不與之共生舉首逆謀咨繳偽劄何足言
功況當邊隅多事之秋尤非閭外邀

恩之日迺荷

特典爵以通侯位列五等之崇萬甲觀瞻動色躬沐
九重之眷三軍壁壘生光竊比班超實增愧赧若言李

廣尤慶遭逢此誠不世殊榮允為

當代異數臣感泣之下益矢忠貞寤寐之中不忘報稱
以仰答

付託之重庶無負

寵畀之隆者矣臣無任感激惶悚之至為此具本專差
官魏有祿齋

奏以

聞康熙十四年五月初三日奏奉

旨覽卿奏謝知道了該部知道

靖逆侯靖逆將軍兼管甘肅提督事務臣張勇謹

題為稟報追撫猇民歸土事康熙十四年五月十九日
據河州副將楊三元報據起台堡守備馬文廣報稱前
奉憲令招撫猇民卑職隨即遵同差官捧執令箭告示
前去宣布

朝廷愛育猇民至意并諭以恩德廣為招徠當有窮民
千餘人傾心願歸於本月十四日俱出老鴉關有在鄉

住劄者有前來入城者除將歸來徇民即行安插外其餘尚未來歸者俟陸續招撫到日另報等情轉報到臣據此該臣看得前奏目達爾加歹成縱兵入犯河州致漢徇人民歸順前去者動以千計臣隨差官撫逐奏目回窠業經題

報在案但臣思漢徇百姓獨非人情乃肯背鄉井棄廬舍相率而去者無非逼于海藝不得已而遠徙也臣查出關之衆將及萬人致地方空虛人烟斷絕臣等無任

慘然若不招其來歸不特

國賦無人輸將且恐勾引海彝將為後日邊地之患矣
臣即發給告示令箭差官同地方官員沿途追趕招撫
去後茲據該將報據招回千餘人入關等由其餘未歸
者俟陸續招來據報到日另咨報部外事關招撫徇民
理合題

報伏乞

皇上睿鑒施行奉

旨覽卿奏招撫徇民千餘具見籌畫周詳可嘉知道了
該部知道

靖逆侯靖逆將軍兼管甘肅提督事務臣張勇謹

題為恭報彝目出邊併調兵勦賊情形仰祈

睿鑒事竊照臣等於本年春會同各鎮起兵進勦之後
適有彝目達爾加歹成率衆犯搶河州臣即兼程馳赴
臨洮遣發官兵追逐出口遂恢復河洮二州業經臣題
報在案今海彝阿喇奈及番族葉賽等又乘我方有事

於河東竟入內地處處侵犯是以甘肅鎮臣孫思克甫
定靖遠即提兵疾回甘涼用備接應臣亦遣通官梁必
昇前往達賴台吉處問其出兵情由并諭以

朝廷德威隨據梁必昇回稱達賴台吉已差數十騎將
威遠南川北川等處葬目盡行調回等情又據鎮海遊
擊張文明報稱各海葬俱撤兵回窠等情臣思我兵正
在計議圍蘭取鞏若海葬復侵邊界未免分我兵勢茲
據前報海葬之兵盡數撤回則我得以悉力進兵無顧

此失彼之虞矣臣等隨將三鎮合兵進攻河東臨洮等緣由遣人間行至秦州報知定西大將軍貝勒當領有清文內開移咨靖逆將軍甘肅巡撫我等大兵克復隴州各處直抵秦州城下四面攻圍逆賊出城三次與我對敵俱被我兵衝殺敗遁今離秦州十里劄營不便分兵前往蘭州爾等遵

旨作速進勦我兩路大兵合力夾攻破賊必矣等因臣等即將河洮等處分佈穩妥當即移調甘肅鎮臣統兵

渡河併力攻勦於五月十七日兵至蘭州與臣等會議
攻圍奈逆賊城內掘壕城上墜石計圖死守一時未能
遽下臣等現在設法陷城俟克獲日另疏題

報但兵馬悉會於蘭所需糧草實費籌畫雖前經臣給
以印文於百姓殷實之家那借米麥料豆共計萬石并
撫臣華善按察使臣伊圖在蘭附近處所購買草束三
十餘萬俱各運到蘭州緣兵馬衆多支用浩繁不久告
匱隨公同會議于兩鎮兵數內撥馬步兵五千交西寧

鎮臣率領圍困蘭州臣等同甘肅鎮臣進取鞏昌然後
遵大將軍貝勒之咨再赴秦州共圖滅寇此臣前後調
兵進勦之大畧也唯是此舉海內盡數出邊則我之兵
力既專大兵聲息相通則我之兵勢又振於以奏底定
之功諒亦在旦暮間矣臣謹會同甘肅鎮臣孫思克西
寧鎮臣王進寶合詞題

報伏乞

皇上睿鑒施行康熙十四年五月二十八日題奉

旨覽卿奏彝目盡數出邊河西地方寧靜卿等統率官兵進取鞏昌約赴秦州合勦具見忠蓋為國籌畫有方勤勞可嘉知道了兵部知道

靖逆侯靖逆將軍無管甘肅提督事務臣張勇謹

題為密陳邊地情形

請添兵馬以資固守事康熙十四年五月十五日據河州副將楊三元呈稱竊照河州地處極邊為避荒衝要之處番彝出沒全賴汎兵以固疆圉查本營額設官兵

除奉抽撥外所有存營兵數寥寥無幾誠恐汎廣兵單不無鞭長莫及之慮況今多事之際尤宜預為隄防庶守禦有資不至臨時周章等情到臣據此該臣查得河州孤懸天末為番彝出入門戶兼之幅輳遼闊防禦尤難若兵力單薄分佈稍疎恐非未雨綢繆之至計也目今海葬雖云回窠而狡謀叵測能保其不為他日之憂添兵防守似難刻緩者矣茲據呈請等由應於該營增添馬兵四百名補設把總一員以資分防者也除即會

商撫臣一面檄令暫行募補以備不虞外謹會同甘寧撫臣華善合詞具

題伏乞

皇上睿鑒勅部議覆施行康熙十四年五月二十九日
題奉

旨戶兵二部會同速議具奏欽此查得該將軍既稱河州為番彝出入門戶防禦不敷等語應如所題准添馬兵四百名補設把總一員俟事平之日裁減可也奉

旨依議

附兵部

題為恭繳

上諭事康熙十四年閏五月初一日奉

上諭諭兵部秦省巖疆重地軍務方殷靖逆將軍靖逆
侯張勇忠勤懋著謀畧優長久鎮西陲奠安疆圉近復
躬履行間殫心籌畫屢敗賊衆恢復城池志期殲滅逆
渠底定秦隴朕甚嘉之凡用兵籌餉一切機宜必須重

其事權不拘常格而後可以整飭軍紀齊一衆心以收
蕩平之績所屬地方總兵官有故違節制不聽調遣者
許即行指叅副將以下有臨陣畏縮殺良冒功者聽以
軍法從事其文官自道員以下倘有遲悞緊急軍需者
許會同巡撫據實叅奏務令克展壯猷早奏膚功以副
朕委任至意爾部即遵諭速行特諭欽此恭捧到部除
遵

旨行文外所有奉到

上諭一道理合恭繳謹此題

知康熙十四年閏五月初五日題奉

旨該衙門察取

靖逆侯靖逆將軍兼管甘肅提督事務臣張勇謹

題為飛報大敗鞏昌賊衆并請

優恤陣亡將弁事竊臣統兵劄營圍困鞏昌日夜巡防
密行偵探務得敵情以預為設伏接應之計當有逆賊
王輔臣遣偽先鋒副將任國治偽副將王友祿于本年

閏五月二十九日三更時分帶領三千餘衆潛至鞏昌
由東門入城臣外示之以弱內實嚴加隄防詎偽總兵
陳可鄭元經偽布政司陳台孫偽道郎熙化等果于六
月初二日帶領各營偽弁潘連等率賊兵六千餘四門
齊出直衝我營幸臣有備隨即鳴號出兵親自臨陣令
千總韓成等率領精兵截賊後路并堵絕城門復令副
叅遊守劉選勝等奮力齊進自鞏昌城西南角殺至城
東陣斬逆賊首級無算屍橫遍野血滿城壕唯餘數十

殘寇擄命奔遁入城得此一捷亦可以破賊心膽矣更活擒四百七十餘賊審係真逆即行正法其無辜被脅者臣仰體

皇上好生之德俱已釋放訖當獲盔甲器械即行給賞有功人員所有陣傷輕重官兵馬匹等項俟查明報部外此皆賴我

皇上天威而諸弁効命之所致也但查撫標遊擊張大選因追殺敗遁賊衆直迫城下當被城上砲打傷亡該

臣看得張大選臨城追賊矢石不避殫心滅寇奮不顧身茲查砲傷殞命深為可憫似宜從優

恩卹以慰忠魂庶行間將士知所激勸者矣緣係勦賊大捷理合報

聞伏乞

皇上睿鑒勅部議覆施行康熙十四年六月初六日題奉

旨覽卿奏率領官兵圍困鞏昌逆賊偽總兵陳可等帶

領賊衆出城拒敵卿等親督官兵奮勇擊賊擒斬甚多
得獲盔甲器械等項具見調度有方將士奮勇可嘉在
事有功人員事平之日議叙具奏遊擊張大選作何恩
卹著議奏兵部知道欽此查遊擊張大選應照例加一
級給

卹銀四百兩准廕子弟一人以守備推用應得祭葬請
勅禮工二部議覆可也奉

旨依議

靖逆侯靖逆將軍兼管甘肅提督事務臣張勇謹

題為密陳三路進兵以收全勝事竊臣觀古來亂臣賊子雖狂逞于一時不旋踵而身膏斧鉞此亦天道之昭然不爽者也吳三桂受

國厚恩不思報効乃包藏禍心圖謀不軌普天切齒恨不滅此而後朝食其亡也亦可立而待者矣但反叛之徒往往盤踞一方以為進戰退守之計所謂負隅之虎人莫敢撓今吳逆據有全滇輜重糧草悉聚于此亦彼

根本之地若不斷其根而鋤其本徒勞

王師四出聲罪致討雖

天威遠播所向無前究竟賊之股肱傷而腹心無恙猶可苟延釜底坐以觀變臣愚以為宜用奇兵出其不意以直破其根本之地根本既失將見分出各路賊兵靡不各慮室家而驚心落膽也此不攻自潰不戰自屈逆謀雖狡其如衆心之瓦解何哉然此法必由三路進兵方可以收全勝所謂三路者一路由草地往麗江之東

一路由草地往麗江之西北東西兩路每路各用一將軍統兵進勦并齎

勅發給麗江各土官令其引導前進蓋麗江一帶舊遭吳逆於其地方採取金銀百姓受其荼毒怨聲載道今若乘其機而驅使前行未有不歡欣鼓舞樂為我用者也更一路須由安龍入師宗州之曲靖查安龍泗辰等州各土官及宋時儂智高之後廣南府土官儂鵬皆臣奉征雲南時所經招撫者後被吳逆凌鑠暴虐心懷憤

恨匪伊朝夕今宜於此路用一將軍統兵進勦亦齋
勅發給各土官如麗江例又未有不樂趨恐後者也且
以雲南二十府屬之土官率被吳逆傾陷絕其宗祀失
其職位怨府愁城已非一日今倘俱蒙給發

勅印復其原官孰不起兵響應為我前驅者乎再祈
勅下平南王并廣東督撫設法調遣官兵從交趾國竟
出雲南地方夾攻并咨會該國王以

王師討逆假道經由該國不必驚恐於是各路精兵一

齊進發直抵雲南攻其無備賊必以我兵從天而下斷
無有不倒戈授首者況目今逆兵精銳者多集於湖南
而腹裏空虛我有數路之兵長驅夾擊功成易易矣此
臣一得之見總為滅賊心切報

國情殷故不揣芻蕘冒瀆

天聽應否可行非臣所敢擅專伏乞

皇上睿裁緣係密陳破賊機宜臣謹具

題請

旨康熙十四年六月十二日題奉

旨議政王貝勒大臣會議具奏欽此該臣等查得將軍
侯張勇為

國籌畫題請三路進兵及加

恩土官從交趾界起兵夾勦所議甚是但各處大兵見
在分頭進勦逆賊其三路進兵之處今不便遽議俟後
有機會再議可也奉

旨依議

靖逆侯靖逆將軍兼管甘肅提督事務臣張勇謹

題為敬抒管見條陳安邊之策以備

採納事竊臣待罪巖疆謬承節鉞凡保境寧民治軍防
寇何一非臣所當夙夜籌畫者蓋非兵則捍禦莫資而
無民則邦本奚賴是設兵恤民二者所關於今日為最
切也至于海彝出沒靡常狡詐莫測若但知撫柔而不
加懲創恐有釀成後日之患者矣茲伏

皇上天威叛逆將盡蕩平海彝悉已遠遁秦省底定自

可計日而待也但既定之後臣又審時度勢有不可不預為之謀者備列三款敬為我

皇上陳之一秦中之要地分佈宜密也查漢中襟帶省會控馭川湖應駐大兵二千名設總兵官一員兵三千名誠以逆賊雖已敗遁而蜀寇方在固守我兵亦暫當養銳之時不得不將通川衝隘布置周密臣料川中殘破已極今賊之催徵尤急民不堪命不過朞月之內人心必至瓦解有此一鎮官兵防守要區然後乘機進取

動出萬全矣再如秦州西控階文南接漢中且附近臨鞏萬山環遶易為盜藪應駐大兵一千名總兵官一員兵三千名但恐一時招募不及或于各鎮抽撥馬戰兵一千五百名步戰兵一千五百名應設將備千把等官亦隨即遴委

題補庶足以濟急用而資控制者也其平涼既有提臣駐劄查固鎮離平涼僅一百六十里相距不遠可以遙制應將固鎮改駐慶陽誠以慶陽僻處山谷地瘠民頑

近遭逆賊蹂躪之後民心不一非設鎮將恐不足以資彈壓也至鳳翔東連省城北通平慶南控漢中西接秦鞏應駐大兵三千名庶足以備四面接應者也更寧夏鎮一缺查見任天津衛總兵官趙良棟向隨臣征勦雲南謀畧膽智迥出尋常臣知之最稔懇乞

皇上俯念寧夏重鎮准調趙良棟移駐於此必能大展猷為無負

簡任者也臣所謂非兵則捍禦莫資者如此一秦省之

百姓宜加憫恤也查自王逆叛變以來河東臨鞏處處被寇摧殘凋敝已極非此賊勒催糧草則彼賊徵索餉銀前追未完後呼又至展轉仳離循環弗絕臣經過各處其顛連情狀不覺觸目傷心今雖節次克復然斯民久罹湯火骨枯髓竭若不大沛恩膏格外撫恤非四散逃亡則委填溝壑將來井里不至於炊烟盡絕不已也
籲請

皇上弘如天之仁若臨洮府屬之蘭州金縣岷州等處

鞏昌之秦州清水秦安徽州兩當等處漢中之寧羌西
安之長武平涼之華亭等處受害最慘准全蠲見年正
供如漳縣洋縣畧陽褒城鳳縣安化寧州環縣等處受
害次之酌蠲本年田賦之半更如通渭南鄭西鄉沔縣
等處受害又次之似應十免其三庶百姓之殘喘得以
少延然後安生樂業輸將恐後而兵食亦有攸賴矣臣
所謂無民則邦本奚賴者如此一海彝之强悍宜行痛
懲也查臣自滇調甘之時業將海彝盡數驅逐回巢間

有悍橫不服者亦經勦殺敗遁故十年以來皆已讐服
不敢侵犯乃自王逆變亂後臣率兵東征海彝復乘內
地有事肆行蠢動侵我邊陲掠我人畜傷亡我官兵在
在告急人心惶惑若非我

皇上天威丕震則河西一帶為其魚肉久矣今幸各彝
部落渙散無統唯聯生格并雲南開路之台吉等互相
聯絡久欲鴟張希圖入犯臣思三邊為秦省重地而甘
肅尤為秦省咽喉若不大彰

天討不特後來深為邊患即目下秋高馬壯未必不乘隙窺伺動我斥堠也茲宜先發以制之俟平慶肆靖貝勒大將軍及各將軍駐兵臨鞏休兵牧馬之時令各鎮乘戰勝之師大舉進勦逐其遠遁庶海葬不敢再萌肆犯之心而我兵亦得以專力進討南方叛寇矣臣所謂不加懲創恐釀成後日之患者如此以上三款以之設兵固防無不戰勝攻取黎民之元氣既復彊圉之烽烟永靖誠今日安邊之要畧也如果臣言可採伏乞

皇上睿鑒勅部議覆施行康熙十四年六月十二日題奉

旨議政王貝勒大臣會議具奏

靖逆侯靖逆將軍無管甘肅提督事務臣張勇謹

題為恭報恢復鞏昌郡城事竊照臣等因圍蘭兵馬衆多軍食不接隨分兵前赴臨鞏會合大兵于閏五月初五日擊敗賊衆一次臣等于初九日兵抵鞏昌蒙定西大將軍多羅貝勒差肅章京卜克撤等來鞏調兵于二

十三日令甘肅鎮臣孫思克統兵赴秦州會合大兵夾勦逆賊去後復于六月初二日鞏賊四門突出被我官兵勦殺幾盡餘賊敗遁入城等情由俱經題

報在案嗣于本月十七日臣等原遣去探聽平涼賊情千總羅天壽報稱王輔臣遣逆子同偽總兵李國樸等帶賊兵數千前來救援鞏昌已至安定監地方下營等情臣一面發兵前去堵勦一面移會定西大將軍多羅貝勒仍令甘肅鎮臣率兵圍鞏合力攻勦併于鞏城四面

環挖壕塹斷賊出路間今六月二十五日大將軍貝勒
遣安西將軍臣穆占帶大兵同甘肅鎮臣孫思克原
領官兵并令投誠總兵陳萬策等一同來鞏齊有赦免
勅諭及大將軍多羅貝勒招撫告示臣等會議亦發告
示令陳萬策等入城招撫衆賊既感

皇上寬宥之恩復見我官兵雲集又掘挖壕塹自知生
路已絕乃于本月二十七日盡行出城投繳偽劄戴罪
歸順軍民歡聲動地皆賴

皇上恩威遠被地方漸次恢復臣等仰體

皇上好生至意一切文武官員俱行宥貸計投誠總兵
副叅遊守千把陳可等共一百二十二員道府廳縣等
官陳台孫等共十九員統領壯丁偽文武官監紀同知
陳曜吉遊擊王克忠等四十六員各營馬步兵丁四千
九百七十五名壯丁五千六百三十名城關戶口共一
十三萬五千七百餘名口除將偽文武官員職名造冊
并繳到偽劄票送部外事關恢復郡邑臣謹會同甘肅

鎮臣孫思克合詞題

報伏乞

皇上睿鑒勅部議覆施行康熙十四年七月初二日題
奉

旨覽卿奏統領官兵圍困鞏昌擊敗逆賊又大將軍貝勒遣將軍穆占鎮臣孫思克等會兵合勦隨齎赦免勅諭招撫賊衆盡行繳劄投誠招撫過僞文武官一百八十餘員兵丁一萬餘名安輯人民一十三萬餘名口恢

復鞏昌府城具見調度有方勦撫並用可嘉在事有功人員著議叙具奏該部知道

靖逆侯靖逆將軍兼管甘肅提督事務臣張勇謹

題為土官戰功足錄懇豁前愆以勵後効事竊自叛賊變亂河東淪陷臣志切討逆率兵東渡實因分布不敷欲抽調各汛綠旗官兵又恐人心不齊查經畧所調各處征兵中途悉皆逃散前轍可鑒必難為用臣於是檄調各處土官結之以恩信勵之以忠貞隨有寧莊各土

官如魯大誥和伯牙李沐等各帶土兵千餘攻圍蘭州
賴其戮力克取臨洮並洮岷土官楊朝樑率屬部土兵
四千餘効命征勦仍倡率各土官如咎成福帶兵二千
有奇馬國棟楊威等各領兵千餘趙之鼎后國璽各帶
兵七八百名俱圍攻岷州蘇成威帶兵三百餘王拱斗
帶兵五百名檄調把守臨洮共糾兵萬餘克復洮州攻
取岷州查陷陣衝鋒不避矢石土官之功獨著且各處
土兵被賊傷亡者甚衆他日論功俱各有優敘毋庸臣

贅惟上官咎成福身負殺人之罪擬定大辟監禁鞏昌
乘隙越獄逃避深山續因逆賊變亂一聞調兵征討欲
糾衆從軍將功贖罪以懷疑生畏不敢前來臣查成例
有戴罪圖功之條遂給以免死照身令其勦賊以自贖
而咎成福即率所部土兵二千有奇克洮攻岷屢著戰
功今奉調帶兵五百同楊威所部前赴鞏昌圍攻逆孽
查咎成福始雖偶犯典刑貪生越獄繼則勦力疆場矢
心報

國似應免其前罪稍加

恩典俾咎成福感激思報以收後効而一時土官亦皆
鼓勵奮往矣但此

恩出自

上裁非臣所敢擅專也臣謹會同甘寧撫臣華善西寧
鎮臣王進寶合詞具

題伏乞

皇上睿鑒勅部議覆施行康熙十四年七月初二日題

奉

旨該部議奏欽此查靖逆將軍侯題敘土官叅成福克
洮圍岷軍功應俟攻克岷州之日一并議敘奉

旨依議

靖逆侯靖逆將軍兼管甘肅提督事務臣張勇謹

題為密報緊急彝情事竊照海彝年來所以不敢侵擾
者實緣定羌廟一捷心膽已寒無以我兵防禦嚴密無
隙可乘也邇因臣同鎮臣率兵東征海彝逆知兵馬悉

調在外內地空虛故前已肆犯搶掠今復鴟張蠢動或
假稱尋馬打牲或借端揀帳駐牧諸如此類無非窺探
虛實希圖侵犯耳臣稔知彝人蓄謀已久擬欲大率精
銳追奔逐北以挫其鋒因中外一家奉有不得擅殺之
嚴旨故未敢即為進兵乃彝人不思

朝廷寬大之典乘我有事之際輒敢揀帳于大草灘蔓
延無忌撫逐不去此亦漸不可長也若不及此時痛加
勦殲至秋高馬壯必統部落前來入犯亦勢所必至矣

金史卷之三
臣愚以為大兵現在河東臣等再統兵馬一同出口大
舉進勦用彰

天討未靖邊氛亦千載一時也但臣與鎮臣俱在河東
用命未敢擅回相應請

旨或臣回駐莊浪兩相彈壓或甘肅鎮臣回甘整飭邊
務事關彝情巨測情由臣謹會同甘寧撫臣華善甘肅
鎮臣孫思克合詞具

題伏乞

皇上睿鑒勅部議覆施行康熙十四年七月初八日題
奉

旨議政王貝勒大臣會同速議具奏欽此該臣等查得
秦州鞏昌蘭州等處雖經次第恢復然陝西全省底定
惟在速取平涼如不將逆賊王輔臣早滅一日則秦省
兵民一日不得安生近經會議行令靖逆將軍侯張勇
與大將軍貝勒等會商作速勦滅逆賊王輔臣平定平
涼等處拯救生民出於水火最為緊要將軍侯張勇總

兵官孫思克等不便回去如葬人顯然有變果實擾民
令總兵官孫思克回甘料理邊務可也奉

旨依議速行

靖逆侯靖逆將軍兼管甘肅提督事務臣張勇謹

題為鞏郡恢復請增官兵以資固防事竊照鞏昌一郡
實當衝要之區東通汧隴南連漢沔西接蘭河北至固
靖乃西秦腹心川蜀咽喉之地也我

朝定鼎之初本郡設立總兵官鎮守後屢經裁減止額

留遊擊一員千總一員把總二員馬戰兵二百名步戰兵一百名守兵二百名但鞏郡為秦保障幅輳遼闊萬山環繞易為盜藪兼以被賊蹂躪之後逃竄流孽出沒不常兵力單薄實難防禦且遊擊職銜亦非所以統攝全郡之險要者也今地方雖經恢復而綢繆之計不可不詳應改設副將一員再設守備一員千總一員把總二員馬戰兵四百名步戰兵二百名守兵一百名與舊額兵共合一千二百名庶緩急有備防禦足資而全城

賴以捍衛安如磐石矣俟事平之日再為酌裁事關增
添官兵重務非臣所敢擅專伏候

上裁臣謹會同甘寧撫臣華善合詞具

題伏乞

睿鑒勅部議覆施行康熙十四年七月初八日題奉

旨戶兵二部會同速議具奏欽此查得該將軍既稱鞏
昌要地兵力單少防禦不敷等語應如該將軍所題俟
事平之日再行裁減可也奉

旨依議

靖逆侯靖逆將軍兼管甘肅提督事務臣張勇謹

題為行間効力歷著戰功特請咨部復職以廣

皇仁事康熙十四年六月十九日准兵部咨前事內開
准靖逆將軍侯張勇咨稱賀雙龍革職雖難考其果否
冤枉但現今隨征効力用命屢有戰功況有革職官員
敘功還職之例今勦賊正殷應否還職惟侯部裁等因
查賀雙龍于康熙十二年十月內奉

旨革職之官今該將軍既稱見今隨征屢有戰功不便據咨查議應咨該將軍查明係何處戰功具題到日再議可也等因備咨到臣准此隨咨西寧鎮臣王進寶即將賀雙龍係何處戰功查明咨覆以憑具

題隨准鎮臣王進寶咨稱查得革職遊擊賀雙龍帶領親丁跟隨本鎮出師赴蘭于本年二月二十三日夜渡河于二十六日至新城與賊對敵斬獲賊級嗣于本年三月內逆賊乘天降大雪直奔營盤衝殺前來本官奮

力勦殺直抵城邊又于本年四月內逆賊大隊突出東門本官奮力當先殺進東關當陣所斬并活捉賊兵以及奪獲器械節經塘報在案況本官對陣之際奮不顧身中箭傷腿屢著戰功其勞績誠不容泯者也等因到臣該臣查得遊擊賀雙龍先以互訐被叅革職繼因征勦逆賊勦力疆場屢立戰功援例呈請復職經臣咨部嗣准部查賀雙龍係何處戰功等因臣即移西寧鎮臣確查去後今准該鎮臣王進寶查明咨覆前來謹會同

甘寧撫臣華善合詞具

題伏乞

皇上睿鑒勅部議覆施行康熙十四年七月初八日題奉

旨兵部知道欽此議得靖逆將軍侯張勇以賀雙龍隨西寧總兵官王進寶出師赴蘭勦力屢立戰功軍功難泯

題請還職前來相應准將賀雙龍復還原職後不為例

可也奉

旨依議

靖逆侯靖逆將軍兼管甘肅提督事務臣張勇謹

題為飛報恢復岷州并有功人員仰祈

睿鑒事康熙十四年七月十六日據洮岷副將楊朝樑
報稱卑職委令隨征叅將馬國棟等前至岷州進城招
撫去後于十三日午時據闔城文武官員劉翊漢等階
州統兵官李永茂等率領兵馬出城各親繳札投誠卑

職隨即遣差官孫進禮等統領漢土兵馬一千名進城安撫百姓俱各復業等情具報到臣據此該臣等看得自逆賊叛變在在附從臣等渡河進勦志欲一鼓蕩平惟因河東郡邑悉非我有兵馬單薄分勦不敷遂檄調土官楊朝標糾率各土官集兵攻取洮岷所屬一帶除洮州已經克取外其岷州于四月內副將楊朝標率原領各土官之兵進攻因偽同知劉翊漢力主堅守布散流言使賊衆負固不服兼以岷州地通階文險要之區

致攻圍四閱月不下其間逆賊數出突犯屢被各土官
殺敗入城又因各土官原無攻城火器臣遣本標右營
把總孫進禮帶烏鎗手三百名前赴協力攻勦仍仰體
皇上好生至德飭令兼用招撫之法聽賊投順今已相
率來歸其發縱指示督率攻圍實副將楊朝樑之功而
効力用命勤勞最著則土官趙弘元馬國棟等俱勞不
可泯者也此皆仰賴我

皇上威福故岷州一時就撫全城得以恢復所有繳到

偽劉咨送兵部外事關恢復岷州城池并勑力人員理
合題

報伏乞

皇上勅部議覆施行康熙十四年七月十九日題奉

旨覽卿奏遣發副將楊朝標等率領官兵圍困岷州屢
敗賊衆隨行招撫闔城官員軍民人等繳劄投誠恢復
岷州城池具見調度有方勦撫並用可嘉在事有功人
員事平之日議敘具奏該部知道

靖逆侯靖逆將軍兼管甘肅提督事務臣張勇謹

題為稟報猺民歸業事竊照河州漢猺百姓前因葬目
入犯逃出萬餘人除先經招回千數入關已經題

報外今于康熙十四年七月二十日據河州副將楊三
元報稱前蒙本將軍差官執持令箭著卑職同地方官
前去關外招撫猺民卑職隨差把總王國弼同差官齊
執令箭于二十日前往招回去後今于本月十五日據
王國弼等稟稱卑職等屢加善言招撫猺民宣諭

卷三
朝廷恩典及各大將軍愛民之意今招來徇民茶商馬
嘉錦馬應才等一萬餘名口卑職等于本月十二日先
行護送進關等情具報到臣據此該臣看得徇民性頗
狡悍今被海彝勾引關外恐日久無倚必將為其所用
是以臣等復遣官前去同地方官善行開諭招撫回歸
今據報招回萬餘盡數進關從此照舊復業可杜邊釁
之患矣事關徇民盡數回歸相應題

報伏乞

皇上睿鑒勅部議覆施行康熙十四年八月初六日題奉

旨覽卿奏招撫到河州徇民萬餘人盡數復業可嘉知道了該部知道

靖逆侯靖逆將軍兼管甘肅提督事務臣張勇謹

奏為恭謝

天恩事康熙十四年七月二十一日准兵部咨為遵

旨議敘事內開奉

諭旨將軍張勇為國効力克盡忠誠恢復河州洮州不日克取蘭州往助圍秦州大兵差伊子張雲翼齎奏前來殊為可嘉將張雲翼作何從優錄用之處著吏兵二部會同速議具奏欽此議得應將張雲翼從優以大四品京堂員缺先用可也等因奉

旨依議欽此移咨到臣臣思錄勤紀勩雖

聖代之弘恩而討逆除奸乃武臣之常職茲者臣男張雲翼業受

恩廕齋奏進

京先以移家蒙

賜五百之帑金復以京堂

擢大四品之任用

俯念疆場微績致邀

楓陛崇褒

湛恩霽自

九重

溫綸頒於兩世如斯

異數洵屬殊榮世以祿仍世以官

盛典之加特渥念臣身因念臣子

天朝之寵實隆揣分難安問心有愧擬辭

成命恐蹈矯飾之愆謹戴

洪慈冀効涓埃之報葢

賞延邇及總知

高厚難酬惟忠藎相承永切捐糜共矢者矣除臣恭設

香案望

闕叩頭謝

恩外為此具本謹具奏

聞康熙十四年八月初六日奏奉

旨覽卿奏謝知道了該部知道

靖逆侯靖逆將軍兼管甘肅提督事務臣張勇謹

奏為恭謝

天恩事竊臣自昔年征勦被傷箭瘡頻發不時痛楚哀

殘困憊日甚一日蒙

皇上不加擯斥俾得待罪巖疆

寵眷之隆已屬

曠典乃荷

勅遣名醫章師吉前至軍前代臣診治以犬馬之軀致
邀

聖主股肱之愛臣雖頂踵捐糜亦難仰酬

皇仁於萬一也茲醫官章師吉於康熙十四年七月二

十六日同臣差官魏有祿已到鞏昌臣謹恭設香案望闕叩頭謝

恩隨請醫官診視據云必俟晴霽鍼治鍼後須靜攝一載或半載俱勿勞苦動作方可復舊臣思見在行間軍務倥偬既非靜攝之時兼以逆氛未靖勦撫方殷恨不能尅期蕩平以抒

宵旰尤非微臣急於治病之日也若一面用鍼一面動作恐治不如法難於奏效有辜

皇上眷顧至意臣之罪更捫髮難數矣臣謹差官護送
醫官章師吉回

京俟孽盡氛銷臣得安靜調攝之時再請

恩旨賜醫治療則有生之日皆報効之年也為此理合
具疏奏

謝伏祈

皇上睿鑒施行康熙十四年八月初六日奏奉

旨該部知道

靖逆侯靖逆將軍兼管甘肅提督事務臣張勇謹

題為地方已經恢復酌駐重臣官兵并要地添設總兵以固封疆以資勦防事康熙十四年八月十九日准兵部密咨內開議得陝西總督哈占疏稱秦州緊要將固原總兵朱衣客移駐秦州漢中接連川疆應設總兵分立三營同大兵駐劄鳳翔逼近南山應設援勦總兵一員令四川左路總兵官陳奇謨將缺額官兵召募補足駐劄鳳翔至於平涼旦晚可破提督陳福必須移駐於

卷三
此寧夏總兵官自應早補等因應

勅下將軍侯張勇將前後事宜詳議到日再議奉

旨依議密咨到臣該臣等看得秦州東接關隴鳳寶南
連畧沔階文允為通川要地是以督臣

請令將軍臣暫駐秦州但臣等前在秦州同大將軍貝
勒會議鞏岷二處新經恢復鞏郡距岷僅二百餘里岷
城迤南之階州見為諸逆盤踞我兵方有事於平涼未
暇攻取隨令西寧鎮臣王進寶統領綠旗兵馬八十有

餘會同大兵駐防秦州臣等仍回駐鞏昌居中策應以防階文而消反側惟俟平涼旦晚收復在秦大兵仍令駐防鎮臣王進寶及甘肅鎮臣孫思克各令回汛彈壓提臣陳福即令駐劄平涼至提臣既駐平涼則寧鎮缺員巖邊要區自當預

請速補秦州為緊要重地急需智勇兼備之大帥方可控制必俟其抵任之後乃可令鎮臣王進寶回汛更查鳳翔為雲棧要衝就便以陳奇謨暫駐鎮守俟陝西平

定之日仍令赴川又漢中接連興安廣元密邇川湖漆
設總兵以備攻守均應如督臣所

請各設總兵一員分立三營惟是軍需恐訕或于秦省
各鎮標營抽撥照馬三步七之例每鎮各設兵三千名
以資聯絡防禦庶地方得以鞏固而糧餉不必議增矣
至於固原鎮既近平涼自應裁併移駐臣等臆見如是
所有詳議過機宜謹會同督臣哈占合詞密

題伏乞

皇上勅部速議施行康熙十四年八月二十四日題奉
旨議政王貝勒大臣會議具奏欽此會議得漢中等處
設鎮添兵臣等請

勅將軍張勇總督哈占等詳議具題到日再議今雖將
軍張勇具題總督哈占尚未具題不便遽議俟總督哈
占具題到日一併再議可也奉

旨依議

靖逆侯靖逆將軍兼管甘肅提督事務臣張勇謹

題為鞏郡恢復請增官兵以資固防事康熙十四年九月二十九日准兵部密咨覆臣題前事內開應如所題改設副將一員再添守備一員千總一員把總二員馬戰兵四百名步戰兵二百名守兵一百名共成一千二百名其應設將備聽該將軍遴選題補等因奉

旨依議欽此備咨到臣臣因鞏昌一郡處四通之間地勢遼闊夙稱險要祇恐兵力單薄難資防禦故前有改設營制增添官兵之請也今欽遵

俞旨除將應增兵馬行令招募外至所需將備看得莊浪副將馬山自叛逆變亂以來調遣征勦屢著功績調補鞏昌副將似為允當其中軍守備查得投誠遊擊金宮聲原係山西千總隨標効用遣防招撫屢副任使堪補鞏昌中軍守備至莊浪副將遺缺查得投誠總兵官陳萬策帶兵一千九百有奇倡先投誠又經定西大將軍給以總兵官委牌遇缺補用且幼曾隨臣征勦久經戰陣聞臣東征故先率兵投誠又不避艱險入鞏昌城內招撫

文武一百八十餘員恢復地方功誠難泯且才畧超衆以
補莊浪副將彈壓要地鼓勵勞員似為得宜者也再照
原任鞏昌遊擊劉彪宜暫令隨臣征勦待後遇缺另行
題補臣因封疆起見謹會同督臣哈占甘寧撫臣華善
合詞具
題伏乞

皇上睿鑒勅部議覆施行康熙十四年十月初四日題奉
旨該部知道欽此該臣等查得投誠偽總兵陳萬策偽

遊擊金官聲俱係秦鞏新經投誠之官今該將軍既稱其招撫有功堪以補用等語均應如該將軍所題莊浪副將馬山應准以原銜調管陝西鞏昌營副將事金官聲應准以署守備管陝西鞏昌副將中軍守備事陳萬策應准以署守備管陝西莊浪副將事其原任鞏昌遊擊劉彪應准遇缺另補可也奉

旨依議

靖逆侯靖逆將軍兼管甘肅提督事務臣張勇謹

題為咨繳偽劄事康熙十四年九月二十九日准兵部咨內開准臣等咨稱河州知州鄒玗衛守備李乘龍州判婁文明前來軍前投誠各繳偽劄一張仍委令照舊管事等因到部查知州鄒玗州判婁文明衛守備李乘龍應否再議或竟免議之處該將軍咨內並未叙明本部不便懸議仍行該將軍等查明具題到日文職聽吏部議武職聽本部議可也等因到臣准此該臣查得河州先為逆賊竊踞知州鄒玗衛守備李乘龍等委係被脇

與附黨從逆者有別故於海葬犯搶河州攻圍城池時
鄒珩等協力防守共保無虞續因臣等遣發官兵驅逐
海葬鄒珩李乘龍婁文明等遂俱赴軍前繳劄投見臣
等因奉有

如能棄邪歸正投獻城池官復原職之

旨且彼時適在用兵之際糧草缺乏故就便會委令其
各復原任徵催糧餉以濟征勦且鄒珩已經臣等

題陞河州監收同知奉有

俞旨
在案
似與
李乘
龍妻
文明
均應
免議
以廣

皇仁
者也
所有
查明
緣由
理合
具

題伏
乞

皇上
睿鑒
勅部
議覆
施行
康熙
十四
年十
月十
九日
題
奉

旨該
部議
奏欽
此查
該將
軍等
既稱
知州
鄒珩
衛守
備
李乘
龍等
委係
被脇
情屬
無奈
故令
各復
原任
均應
免
議等
語應
將衛
守備
李乘
龍免
議准
復原
任文
職鄒
珩

婁文明聽吏部議可也奉

旨依議

靖逆侯靖逆將軍兼管甘肅提督事務臣張勇謹

密題為欽奉

上諭事准兵部咨開康熙十四年十月初九日奉

上諭諭兵部奏省最為緊要故一切綏定地方勦除賊
寇倚任將軍侯張勇雖有定西大將軍貝勒統領大兵
圍困平涼倘賊寇死守有需月日亦未可定且聞川賊

過長寧驛已到平涼若不速取平涼以滅逆賊王輔臣
秦省不即底定百姓必至重困勿以大將軍貝勒在陝
有所瞻顧致悞大事目今克取平涼其事所關最要輩
昌宜量留官兵張勇親統官兵速與大將軍貝勒董格
等會合并力急取平涼若萬不可親身離鞏則多撥標
下精銳官兵作速發往平涼至於盤龍坡長寧驛等處
賊來救援之路作何防禦張勇等酌量而行其速定平
涼事關重大將軍侯張勇朕倚任甚殷務令慰朕西顧

之懷爾部作速行文欽此相應行咨等因到臣該臣看得逆賊王輔臣死據平涼又有川賊赴援誠宜速靖逆孽以安地方今蒙

皇上令臣親赴平涼或遣兵發往仰見

神武弘謨無微不至臣感

眷注之殷亟宜親行以抒

皇上西顧之懷但臣屢接定西大將軍貝勒臣札示鞏秦地方最為緊要川賊蠢動惟賴將軍巡撫彈壓等語

又查河西各邊將屢報海驍麥力幹等有收拾兵馬入內犯邊情形萬一知我虛實狂逞入犯乏兵堵禦非計之得也故臣等特撥甘肅鎮標并各營馬步兵一千名令永固城副將黃鉉統領回汎防禦再撥各營兵一千名令鎮番叅將陳應啓統領赴高古城隄防又查蘭州為河西咽喉臣與甘西二鎮遠在各處鞭長莫及復量撥各營馬步兵丁一千五百名令莊浪副將馬山安遠叅將呂天玉等協守河口此臣移緩就急之策也至於

臣標額設馬兵五千名除留守甘州兵五百名并西安至鞏昌鞏昌至平涼兩路安設塘撥兵四百名而臣標中營副將劉選勝後營遊擊劉虎隨甘肅鎮臣出征平涼帶領馬兵一千一百名又撥營馬三百匹馱載盔甲及甘肅鎮臣到平涼貝勒因其標營馬匹倒斃過多移臣添撥臣復於戰馬內撥給三百六十匹以資征勦又因固原逆賊鴟張屢犯靜寧地方勒催百姓運糧臣同撫臣商議遣撫標遊擊岳鎮邦本標守備孫進禮帶撫

標馬兵五百名臣標馬兵七百名駐防靜寧再遣臣標千把總羅天壽狄世俊帶兵三百駐防馬營監梁家河等處又岷州地方逆賊譚宏等帶兵萬數入犯土兵見有損失不能阻當臣一面塘報貝勒一面遣守備柳開甲帶馬步兵五百名前去岷州堵勦今賊與我兵隔河相持臣擬再遣標兵五百名協力防禦其情形尚在叵測此臣標營兵馬撥發之大畧也再照分防安會伏羌臨洮各州縣原係甘西二鎮標兵今鎮臣俱各撤回帶

領征勦臣又遣撥標營馬兵一百或五六十名不等共
調去兵四百名而臣標見在之兵僅一千六百矣近准
西寧鎮報稱逆賊吳之茂帶領五員偽總兵統兵數萬
于單家河小川子徽州等處下營未敢遽爾入犯者良
以窺探虛實耳今臨蘭秦鞏洮岷各營兵馬尚在招募
為數無幾且無盔甲又係新招難堪任用撫臣華善標兵
一千五百亦分發各處防守在鞏不過數百今鞏秦岷
州賊勢如此加之解散降兵雜聚其間臣赴平涼必須

調回本標出防之兵庶便前去但恐倉卒撤回而各處
地方設有反側不可不深慮也且臣一經動移逆賊聞
知或乘虛入犯則鞏岷等處未能保其無患是平涼固
屬重大鞏岷亦為要區臣晝夜思維酌度時勢誠不便
遠離鞏昌且兵甚單薄委無發往平涼之兵合無請乞
皇上勅下陝西提臣陳福速行進兵協勦逆賊庶底定
之勲得以早奏矣為此理合具疏題

報伏乞

睿鑒勅部議覆施行康熙十四年十月二十一日題奉
旨議政王貝勒大臣會議具奏欽此該臣等查得靖逆
將軍侯張勇身在地方既稱鞏岷甚為緊要誠不便遠
離鞏昌兵甚單薄委無發往平涼之兵俱如所題固守
鞏昌秦州等處堵禦逆賊又先經會議令在陝西神水
所有歸化城土墨忒蒙古兵馬及駐劄大同副都統搦
塔大兵速赴提督陳福處協力進取固原今此兩處兵
馬不拘何處兵馬先到提督陳福處該提督即往會合

卷三
大將軍貝勒等大兵協力速取平涼勦滅逆賊可也奉
旨依議速行

靖逆侯靖逆將軍兼管甘肅提督事務臣張勇謹

題為酌移糧餉募兵征勦以靖逆氛事竊照川逆鴟張
盤踞各口階文迤東商州迤西俱有逆賊突犯無以吳
之茂入寇西和王輔臣死拒平涼勦禦之際在在需兵
目今各鎮兵馬分布不敷而臣標雖有兵馬五千分防
遣征之外所留無幾兵力單薄克敵為艱擬


請添兵又須增餉臣查得興安漢中地方已被賊據而
原設興安鎮標各營官兵今已虛懸其糧餉之數可估
計而知合無將興安一鎮所屬各營官兵估定俸餉移
撥臣標或在甘寧西三鎮標下以資招募進勦所需馬
匹移會甘撫招中牽領如是兵既增加則征防有賴而
底定之績可立奏矣俟興漢恢復之後再將原撥餉銀
照數發回興安鎮其招募兵馬撥發興漢等處以資防
禦庶糧餉不致增添兵馬又得充足勦禦咸溝秦疆可

定矣臣因征勦起見伏乞

皇上睿鑒勅部議覆施行康熙十四年十一月二十二

日題奉

旨依議速行



張襄壯奏疏卷三